



Na osnovu člana 22 Statuta Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj 2/10 – prečišćeni tekst), Skupština Brčko distrikta Bosne i Hercegovine na 54. redovnoj sjednici održanoj 17. januara 2024. godine, usvaja

ZAKON
O IZMJENAMA I DOPUNAMA ZAKONA O POLICIJI
BRČKO DISTRIKTA BOSNE I HERCEGOVINE

Član 1

U Zakonu o Policiji Brčko distrikta Bosne i Hercegovine („Službeni glasnik Brčko distrikta Bosne i Hercegovine“, brojevi: 18/20 – prečišćeni tekst, 41/20, 6/21 i 6/23) član 1 mijenja se i glasi:

„Član 1
(Predmet)

Zakonom o Policiji Brčko distrikta Bosne i Hercegovine (u daljnjem tekstu: Zakon o Policiji) propisuju se: principi policijske službe, poslovi Policije Brčko distrikta Bosne i Hercegovine (u daljnjem tekstu: Policija) u nadležnosti Brčko distrikta Bosne i Hercegovine (u daljnjem tekstu: Distrikt), unutrašnja organizacija Policije, rukovođenje Policijom, nadležnosti šefa Policije, zamjenika šefa Policije (u daljnjem tekstu: zamjenik) i pomoćnika šefa Policije (u daljnjem tekstu: pomoćnik), nadležnost i funkcionisanje Nezavisnog odbora za izbor šefa Policije i zamjenika šefa Policije (u daljnjem tekstu: Nezavisni odbor), disciplinska odgovornost šefa Policije, zamjenika i pomoćnika, kadrovski poslovi, saradnja s drugim policijskim organima i drugim relevantnim organima u Bosni i Hercegovini (u daljnjem tekstu: BiH) i druga pitanja od značaja za organizaciju, rad i ostvarivanje poslova Policije i prava radnika Policije.“

Član 2

U članu 11 stav 1 mijenja se i glasi:

„(1) Fizičko i pravno lice može na rad Policije uložiti pritužbu, molbu i prijedlog Jedinici za profesionalne standarde i Komisiji Skupštine Distrikta za javnu sigurnost i nadzor nad radom Policije.“

Stavovi 3 i 4 se brišu.

Dosadašnji stav 5 postaje stav 3.

Član 3

U članu 12 tačka f) mijenja se i glasi:

„f) poslovi i zadaci koji se odnose na održavanje mirnog okupljanja i javne priredbe;“.

Iza tačke l) ovog člana dodaju se nove tačke m), n) i o) koje glase:

„m) primjena evropskih i međunarodnih standarda u vezi s obavljanjem poslova Policije;

n) usklađivanje propisa iz nadležnosti Policije s propisima Evropske unije i međunarodnim standardima;

o) provođenje međunarodnih sporazuma o policijskoj saradnji i drugih međunarodnih instrumenata u nadležnosti Policije;“.

Dosadašnje tačke m), n) i o) postaju tačke p), r) i s).

Član 4

Iza člana 20 dodaju se novi članovi 20a, 20b, 20c i 20d, koji glase:

„Član 20a (Plan integriteta)

(1) Policija donosi Plan integriteta koji je interni antikoruptivni dokument koji sadrži skup mjera kojima se sprečavaju i otklanjaju mogućnosti za nastanak i razvoj različitih oblika koruptivnog i drugog neprofesionalnog ponašanja.

(2) Plan integriteta se izrađuje u skladu s Jedinstvenom metodologijom i smjernicama za izradu i provođenje planova integriteta u organima javne uprave i institucijama Brčko distrikta Bosne i Hercegovine s ciljem uspostavljanja mehanizama koji će osigurati efikasno i efektivno funkcionisanje Policije kroz jačanje odgovornosti, pojednostavljenje procedura, povećanje transparentnosti kod donošenja odluka, kontrolu diskrecionih ovlaštenja, poštovanje etičkih vrijednosti, uvođenje efikasnog sistema nadzora i kontrole rada i ponašanja zaposlenika.

(3) Obavezan sadržaj Plana integriteta jeste procjena podložnosti pojedinih radnih mjesta, radnih procesa i poslova nastanku i razvoju korupcije i drugim oblicima narušavanja integriteta, vrste rizika od pojave i razvoja korupcije odnosno narušavanja integriteta i drugih vrsta neprofesionalnog ponašanja kao i skup mjera, kako preventivnih tako i naknadnih iz stava 1 ovog člana odnosno mjera kojima se sprečava i otklanja mogućnost korupcije.

Član 20b (Izvjestaj o imovinskom stanju)

(1) S ciljem prevencije koruptivnog djelovanja, zaposleni u Policiji podnosi Jedinici za profesionalne standarde Izvjestaj o imovinskom stanju (u daljnjem tekstu: Izvjestaj).

(2) Šef Policije, zamjenik i pomoćnik su nosioci javne funkcije i na njih se primjenjuje Zakon o sprečavanju sukoba interesa u institucijama Brčko distrikta Bosne i Hercegovine.

(3) Zaposleni u Policiji dužan je podnijeti:

a) dopunu Izvjestaja za svaku promjenu sadržaja Izvjestaja iz člana 20c stava 1 ovog zakona u roku od 30 dana od dana nastanka promjene;

b) dopunu Izvjestaja u slučaju uvećanja imovine po bilo kojem osnovu u iznosu većem od 10.000 KM, u roku od 30 dana od dana nastanka uvećanja imovine;

c) ažurirani Izvjestaj na zahtjev Jedinice za profesionalne standarde, u roku od 30 dana od dana prijema takvog zahtjeva.

(4) Zaposleni podnosi Izvjestaj za sebe, bračnog i vanbračnog druga, djecu, druge članove porodičnog domaćinstva kao i lica prema kojima zaposleni ima zakonsku obavezu održavanja, prema stanju na dan kada je zasnovao radni odnos.

Član 20c (Sadržaj Izvjestaja)

(1) Izvjestaj sadrži:

- a) lične podatke zaposlenog i lica iz člana 20b stava 4 ovog zakona, uključujući i jedinstveni matični broj;
- b) podatke o sadašnjim prihodima i izvorima prihoda, uključujući sve prihode, plate, dobit od imovine, uplate i druge zarade ostvarene u BiH i u inostranstvu u protekloj kalendarskoj godini;
- c) podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 10.000,00 KM, u BiH i inostranstvu;
- d) podatke o rashodima i drugim obavezama, uključujući sva dugovanja, obaveze, mjenice, kredite i jamstva za takve obaveze u BiH i inostranstvu.

(2) Vrijednost imovine iz stava 1 tačke c) ovog člana, u slučaju sumnje utvrđuje se na osnovu nabavne cijene imovine.

(3) Podaci o imovini zaposlenog obuhvataju podatke o naslijeđenoj i stečenoj imovini.

(4) U Izvještaj se obavezno unosi podatak o načinu sticanja imovine, odnosno izvorima sredstava iz kojih je kupljena pokretna i nepokretna imovina koja se prijavljuje po ovom zakonu.

(5) Jedinica za profesionalne standarde može od zaposlenog zahtijevati odgovarajuće dokaze za pojedine dijelove iz Izvještaja.

(6) Zaposleni je odgovoran za tačnost i potpunost podataka u Izvještaju.

(7) Sadržaj obrasca Izvještaja i način popunjavanja utvrđuju se Pravilnikom o sadržaju, načinu popunjavanja obrasca izvještaja, postupku prikupljanja i provjere podataka navedenih u izvještaju (u daljnjem tekstu: Pravilnik), koji donosi šef Policije.

Član 20d

(Provjera podataka iz Izvještaja)

(1) Provjeru podataka iz Izvještaja vrši Jedinica za profesionalne standarde slučajnim odabirom izvještaja i na osnovu prijave s indicijama koruptivnog ponašanja zaposlenog.

(2) Za zaposlene na radnim mjestima za koje je procjenom u Planu integriteta utvrđena naročita podložnost nastanku i razvoju korupcije, provjera podataka iz Izvještaja provodi se svakih šest mjeseci i na osnovu sumnje u tačnost datih podataka odnosno na drugi način prikupljenih informacija o indicijama koruptivnog ponašanja.

(3) Provjera podataka predstavlja provjeru tačnosti i potpunosti podataka iz Izvještaja i može se vršiti upoređivanjem podataka s podacima o imovinskom stanju zaposlenog prikupljenim od organa i pravnih lica u Bosni i Hercegovini i inostranstvu koji raspolažu informacijama, odnosno organa i pravnih lica koja vode evidencije o podacima.

(4) Policija se može obratiti relevantnim organima i institucijama u BiH i inostranstvu s ciljem prikupljanja informacija neophodnih za provjeru sadržaja Izvještaja.

(5) Ukoliko se u postupku provjere tačnosti podataka utvrdi da zaposleni nije naveo tačne i potpune podatke u Izvještaju, zaposleni će se pozvati da obrazloži nesaglasnosti u podacima u određenom roku te ukoliko takvo obrazloženje ne pruži dovoljno informacija koje opravdavaju takvu nesaglasnost ili u potpunosti izostane, pokreće se postupak radi utvrđivanja disciplinske odgovornosti.

(6) Postupak prikupljanja podataka i njihove provjere uređuje se Pravilnikom iz člana 20c stava 7 ovog zakona.“

Član 5

U članu 22 stavu 1 tačka z) mijenja se i glasi:

„z) osigurava saradnju s Uredom za prevenciju korupcije i koordinaciju aktivnosti na suzbijanju korupcije i određuje lice zaduženo za komunikaciju i saradnju saglasno Zakonu o Uredu za prevenciju korupcije i koordinaciju aktivnosti na suzbijanju korupcije Brčko distrikta Bosne i Hercegovine;”.

Iza tačke z) dodaju se nove tačke aa), bb), cc) i dd) koje glase:

„aa) osigurava provođenje Plana integriteta u Policiji;

bb) osigurava saradnju s agencijama za provođenje zakona i ostalim nadležnim službama stranih država, iz nadležnosti Policije;

cc) osigurava provođenje ostalih međunarodnih sporazuma o policijskoj saradnji i drugih međunarodnih instrumenata, iz nadležnosti Policije;

dd) preduzima i druge mjere radi profesionalnog rukovođenja Policijom.“

Član 6

U članu 66 iza stava 2 dodaje se novi stav 3 koji glasi:

„(3) Pravilnikom o unutrašnjoj organizaciji utvrđeni su kriteriji, ograničen broj i visina posebne naknade specifičnih radnih mjesta iz stava 1 ovog člana.“

Član 7

Iza člana 77 dodaje se novi član 77a koji glasi:

„Član 77a

(Donošenje Pravilnika)

Šef Policije dužan je donijeti Pravilnik iz člana 20c stava 7 ovog zakona u roku od šest mjeseci od dana stupanja na snagu ovog zakona.“

Član 8

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-181/24

Brčko, 17. 1. 2024. godine

PREDSJEDNIK
SKUPŠTINE BRČKO DISTRIKTA BiH
mr. sci. Siniša Milić